



Na osnovu člana 15. Zakona o Upravi za indirektno oporezivanje ("Službeni glasnik BiH", broj 89/05) i člana 61. stav 2. Zakona o upravi ("Službeni glasnik BiH", br. 32/02 i 102/09), direktor Uprave za indirektno oporezivanje donosi

## U P U T S T V O

### O VRAĆANJU IZVEZENE ROBE

#### GLAVA I. OPĆE ODREDBE

##### Član 1. (Predmet)

Ovim Uputstvom bliže se propisuje način provođenja postupka pri ponovnom uvozu i stavljanju u slobodan promet robe iz Bosne i Hercegovine (u daljnjem tekstu: BiH) koja se nakon izvoza iz carinskog područja BiH, u nepromijenjenom stanju, vraća u to područje (u daljnjem tekstu: vraćena izvezena roba), postupak oslobađanja od plaćanja uvoznih dažbina na vraćenu izvezenu robu i druga pitanja u vezi tog postupka.

##### Član 2. (Pravni osnov)

Postupak u vezi vraćene izvezene robe iz člana 1. ovog Uputstva reguliran je:

- a) odredbama člana 177. do 179. Zakona o carinskoj politici Bosne i Hercegovine ("Službeni glasnik BiH", br. 57/04, 51/06, 93/08 i 54/10), (u daljnjem tekstu: Zakon),
- b) odredbama člana 419. do 429. Odluke o provedbenim propisima Zakona o carinskoj politici Bosne i Hercegovine ("Službeni glasnik BiH", br. 63a/04, 60/06 i 57/08), (u daljnjem tekstu: Odluka), uključujući i Prilog 47 i 52 Odluke i
- c) propisima o popunjavanju carinske prijave.

##### Član 3. (Definicije)

U primjeni ovog Uputstva pojmovi imaju sljedeće značenje:

- a) "vraćena izvezena roba" - znači roba iz BiH koja se nakon izvoza iz carinskog područja BiH, u nepromijenjenom stanju, uključujući i izuzeća navedena u članu 6. ovog Uputstva, vraća u to područje (u daljnjem tekstu: vraćena roba),
- b) "bh. roba" - znači roba u smislu člana 4. tačka (12) Zakona,
- c) "izvozni carinski ured" - znači carinski ured nadležan za postupak izvoznog carinjenja,
- d) "carinski ured ponovnog uvoza" - znači carinski ured kod kojeg je za vraćenu robu podnijeta carinska prijava za ponovni uvoz i puštanje u slobodan promet. To, prema članu 423., 425.,

427. i 429. Odluke, može biti izvozni carinski ured kod kojeg je vraćena roba prethodno bila izvezno ocarinjena ili neki drugi carinski ured kod kojeg je podnijeta navedena carinska prijava za vraćenu robu,

- e) "zainteresirano lice" - znači lice koje traži primjenu oslobađanja od plaćanja uvoznih dažbina na vraćenu robu. To može biti lice koje je robu izvezlo (izvoznik), ali i svako drugo lice sa sjedištem ili prebivalištem u BiH, koje carinskom uredu ponovnog uvoza predoči ili može predočiti vraćenu robu, zajedno sa dokumentima neophodnim za provođenje carinskog postupka i odlučivanje o traženom oslobađanju od plaćanja uvoznih dažbina.

## GLAVA II. UVJETI ZA OSLOBAĐANJE OD PLAĆANJA UVOZNIH DAŽBINA

### Član 4.

(Uvjeti za oslobađanje od plaćanja uvoznih dažbina)

(1) Vraćena roba pri njenom ponovnom uvozu i puštanju u slobodan promet u carinsko područje BiH, na zahtjev zainteresiranog lica, oslobađa se od plaćanja uvoznih dažbina pod uvjetima iz člana 177. i 178. Zakona, tj. pod sljedećim uvjetima:

- a) da se u roku od tri godine vraća (ponovno uvozi) u carinsko područje BiH. Ovaj rok se, uzimajući u obzir posebne okolnosti, može produžiti,
- b) da se vraća u nepromijenjenom stanju, odnosno u stanju u kojem je bila izvezena. Odstupanje od ovog uvjeta navedeno je u članu 6. ovog Uputstva,
- c) da se sa sigurnošću vraćena roba može identifikovati, tj. utvrditi istovjetnost robe (da se kod izvezene i vraćene robe radi o istoj robi).

(2) Prema članu 419. Odluke, uz ispunjenje uvjeta iz člana 177. i 178. Zakona, vraćena roba, na zahtjev zainteresiranog lica, oslobađa se od plaćanja uvoznih dažbina i ako se vraća samo dio prethodno izvezene robe. Navedeno se primjenjuje i kada se vraćena roba sastoji od dijelova ili pribora koji pripadaju mašinama, instrumentima, aparatima i drugim proizvodima koji su bili prethodno izvezeni iz carinskog područja BiH.

(3) Vraćena roba za koju je, shodno članu 177. Zakona, odobreno oslobađanje od plaćanja uvoznih dažbina, prema članu 26. stav (1) tačka 2. Zakona o porezu na dodatu vrijednost ("Službeni glasnik BiH", br. 90/05, 35/05 i 100/08) oslobođena je i od plaćanja poreza na dodatu vrijednost ako robu vraća isto lice koje ju je i izvezlo. Ako robu vraća drugo lice tada vraćena roba podliježe naplati poreza na dodatu vrijednost.

(4) Vraćena roba za koju je, shodno članu 177. Zakona, odobreno oslobađanje od plaćanja uvoznih dažbina, prema članu 30. stav 1. tačka c) i članu 38. Zakona o akcizama u Bosni i Hercegovini ("Službeni glasnik BiH", broj 49/09) i članu 37. Pravilnika o primjeni Zakona o akcizama u Bosni i Hercegovini ("Službeni glasnik BiH", broj 50/09), oslobođena je i od plaćanja akcize i putarine.

(5) Vraćena roba za koju je, shodno članu 177. Zakona, odobreno oslobađanje od plaćanja uvoznih dažbina, prema članu 2. Odluke o slučajevima kada se ne naplaćuje iznos od 1% carinske vrijednosti za carinsko evidentiranje ("Službeni glasnik BiH", broj 31/05), oslobođena je i od plaćanja iznosa od 1% carinske vrijednosti za carinsko evidentiranje.

## Član 5.

(Rok za vraćanje robe)

(1) Rok za vraćanje robe, radi ostvarivanja prava na oslobađanje od plaćanja uvoznih dažbina, je tri godine, koji rok se računa od dana prihvatanja carinske prijave na osnovu koje je obavljen izvoz te robe.

(2) Kada je vraćena roba prijavljena za ponovni uvoz i stavljanje u slobodan promet uz oslobađanje od plaćanja uvoznih dažbina nakon isteka roka iz stava (1) ovog člana, može se, shodno članu 177. stav 2. tačka (a) Zakona, odobriti produženje tog roka samo u slučajevima kada to zahtijevaju posebne okolnosti (npr. prirodne nepogode, socijalni nemiri, slučaj više sile ili druge slične okolnosti usljed kojih nije bilo moguće u roku isporučiti ili preuzeti (vratiti) robu), što se mora dokumentirati. Carinski ured ponovnog uvoza preko kojeg se vraćena roba ponovno uvozi nakon isteka navedenog roka, u svakom konkretnom slučaju, a na osnovu za tu rubu podnesene carinske prijave iz člana 13. stav (1) ovog uputstva i priloženih dokumenata, cijeni da li su ispunjeni uvjeti za produženje tog roka, odnosno za odobravanje traženog oslobađanja po predmetnoj carinskoj prijavi.

(3) U slučaju da se ne odobri produženje navedenog roka, odnosno ne odobri traženo oslobađanje od plaćanja uvoznih dažbina, vraćena roba podliježe plaćanju uvoznih dažbina i primjeni mjera trgovinske politike.

## Član 6.

(Izuzeca od uvjeta da je vraćena roba u nepromijenjenom stanju)

(1) Izuzetno od člana 178. Zakona, u svrhe oslobađanja od plaćanja uvoznih dažbina, a prema odredbama člana 420. Odluke, smatra se da je vraćena roba u istom stanju u kojem je bila izvezena:

- a) roba koja, nakon izvoza iz carinskog područja BiH, nije prošla bilo kakvo postupanje osim onog koje je potrebno da je održi u dobrom stanju ili rukovanje koje samo mijenja njen izgled,
- b) roba koja je, nakon izvoza iz carinskog područja BiH, prošla postupanje osim onog koje je potrebno da je održi u dobrom stanju ili rukovanje koje samo mijenja njen izgled, ali koja se pokazala kao defektna ili neprikladna za namjeravanu upotrebu. Da bi se u tom slučaju smatralo da je roba u istom stanju mora se ispuniti jedan od sljedećih uvjeta:
  - 1) takvo postupanje ili rukovanje bilo je primjereno na robu isključivo u cilju njene popravke ili vraćanja u dobro stanje,
  - 2) njena neprikladnost za namjeravanu upotrebu radi koje je izvezena je postala očigledna tek nakon što je takvo postupanje ili rukovanje započelo.

(2) Ako je vraćena roba, nakon izvoza iz carinskog područja BiH, prošla postupanje ili rukovanje dopušteno u skladu sa stavom (1) tačka b) ovog člana, a takvo postupanje bi je učinilo podložnom uvoznim dažbinama da je bila stavljena u postupak vanjske obrade, uvozne dažbine se obračunavaju i naplaćuju u skladu sa pravilima propisanim za obračun tih dažbina u postupku spoljne obrade.

(3) Bez obzira na stav (2) ovog člana, oslobađanje od plaćanja uvoznih dažbina odobrava se ako zainteresirano lice dokaže da je vraćena roba, nakon izvoza, bila predmet popravke ili vraćanja u dobro stanje neophodno radi nepredviđenih okolnosti koje su nastale izvan carinskog područja BiH, te ako vrijednost vraćene robe zbog takve popravke ili vraćanja u dobro stanje nije veća od njene vrijednosti u trenutku izvoza iz carinskog područja BiH.

(4) U smislu stava (3) ovog člana:

- a) popravak ili vraćanje u dobro stanje koje je postalo neophodno znači svaka radnja za ispravljanje kvarova u funkcioniranju ili materijalna šteta koju je roba pretrpila dok se

nalazila izvan carinskog područja BiH, a bez kojih se ta roba ne bi mogla više upotrijebiti na uobičajen način u svrhe za koje je bila namijenjena,

- b) za vrijednost vraćene robe smatra se da nije veća, zbog radnji koje je prošla, od njene vrijednosti u trenutku izvoza iz carinskog područja BiH kada ta radnja ne prelazi onu koja je nužno neophodna da bi se omogućilo daljnje korištenje te robe na isti način kao u trenutku izvoza.

(5) Kada popravak ili vraćanje robe u dobro stanje iziskuje ugradnju rezervnih dijelova, takva ugradnja je ograničena samo na nužne dijelove koji omogućavaju da se roba koristi na isti način kao u trenutku izvoza.

### **Član 7.**

(Identifikacija vraćene robe)

(1) U svrhu dokaza ispunjenosti uvjeta iz člana 4. stav (1) tačka c) ovog Uputstva, tj. radi utvrđivanja identifikacije robe, kao mjera ili sredstvo identifikacije vraćene robe, ovisno od karaktera robe koja je u pitanju i mogućeg rizika njene zamjene, koristi se izvozna carinska prijava, faktura i druga dokumenta priložena uz tu prijavu, te druga sredstva identifikacije (npr. deklaracija robe, marka, brojevi ili oznake trajno pričvršćene na robu, prospekti, brošure, ugovori, fotografije i druge identifikacione mjere upotrijebljene pri izvozu vraćene robe) ili da se na drugi odgovarajući način može dokazati da je vraćena roba koja je i izvezena. Teret dokazivanja ispunjenosti navedenog uvjeta je na zainteresiranom licu.

(2) U svrhu iz stava (1) ovog člana, zainteresirano lica može, uz carinsku prijavu o ponovnom uvozu i puštanju u slobodan promet vraćene robe, umjesto izvozne carinske prijave, priložiti dokumenat koji sadrži neophodne podatke za identifikaciju vraćene robe, a to je lista s podacima INF 3.

## **GLAVA III. POSTUPAK IZDAVANJA I UPOTREBE LISTE S PODACIMA INF 3**

### **Član 8.**

(Izdavanje liste s podacima INF 3)

(1) Listu s podacima INF 3 izvoznik sačinjava i podnosi izvoznom carinskom uredu u originalu i dvije kopije, na obrascu propisanom Prilogom 52 Odluke.

(2) Listu s podacima INF 3, na zahtjev izvoznika, izdaje izvozni carinski ured u trenutku završetka izvoznih radnji i postupka za robu na koju se odnosi, ako izvoznik izjavi da će ta roba vjerovatno biti vraćena preko nekog drugog carinskog ureda, a ne preko izvoznog carinskog ureda.

(3) Listu s podacima INF 3, na zahtjev izvoznika, izvozni carinski ured može izdati i nakon završetka izvoznih radnji i postupka za robu na koju se odnosi, samo pod uvjetom da taj ured na osnovu raspoloživih podataka može sa sigurnošću utvrditi da se podaci u zahtjevu izvoznika odnose na izvezenu robu.

(4) Izvozni carinski ured, nakon ovjere ispravno popunjene liste s podacima INF 3 koja sadrži sve podatke potrebne za utvrđivanje identifikacije robe, original i jednu kopiju te liste vraća izvozniku za podnošenje carinskom uredu ponovnog uvoza, a drugu kopiju zadržava i odlaže uz izvozna carinsku prijavu na koju se odnosi.

### **Član 9.**

(Izdavanje više lista s podacima INF 3 i liste za dio robe)

(1) Lista s podacima INF 3 sadrži sve podatke koje carinski organi zahtijevaju u svrhu identifikacije izvezene robe.

(2) Ako se očekuje da će izvezena roba biti vraćena u carinsko područje BiH preko više carinskih ureda, a ne preko izvoznog carinskog ureda, izvoznik može tražiti da mu se izda veći broj lista s podacima INF 3 koje sadrže cjelokupnu količinu izvezene robe. Također, izvoznik može, od izvoznog carinskog ureda koji je izdao listu s podacima INF 3, tražiti da je zamijeni s nekoliko lista s podacima INF 3 koje sadržavaju cjelokupnu količinu robe navedene u prvobitno izdatoj listi s podacima INF 3.

(3) Izvoznik može zahtijevati izdavanje liste sa podacima INF 3 i samo za dio izvezene robe.

### **Član 10.**

(Označavanje liste s podacima INF 3 u slučaju ponovnog uvoza i dostava podataka izvoznom carinskom uredu)

(1) Carinski ured ponovnog uvoza, na originalu i kopiji liste s podacima INF 3 podnijetoj od strane zainteresiranog lica unosi količinu vraćene robe za koju je odobrio oslobađanje od plaćanja uvoznih dažbina shodno članu 177. Zakona, u koje obavezno upisuje broj i datum carinske prijave za puštanje te robe u slobodan promet, te zadržava original, a kopiju liste s podacima INF 3 dostavlja izvoznom carinskom uredu koji ju je izdao.

(2) Izvozni carinski ured koji je izdao listu s podacima INF 3, po prijemu njene kopije od carinskog ureda ponovnog uvoza, upoređuje tu kopiju sa kopijom koju je zadržao prilikom izdavanja i istu odlaže uz izvoznju carinsku prijavu.

### **Član 11.**

(Izdavanje duplikata liste s podacima INF 3 u slučaju krađe, gubitka ili uništenja originala)

U slučaju krađe, gubitka ili uništenja originalne liste s podacima INF 3, izvoznik može, od izvoznog carinskog ureda koji ju je izdao, zatražiti izdavanje duplikata. Zahtjevu će se udovoljiti ako to opravdavaju okolnosti konkretnog slučaja. Izvozni carinski ured, na izdatom duplikatu liste s podacima INF 3 (na originalu i obje kopije) mora unijeti oznaku "DUPLIKAT".

### **Član 12.**

(Dostavljanje podataka carinskom uredu ponovnog uvoza)

(1) Izvozni carinski ured dostavlja carinskom uredu ponovnog uvoza na njegov zahtjev sve raspoložive podatke, kako bi taj ured mogao utvrditi da li vraćena roba ispunjava neophodne uvjete za traženo oslobađanje od plaćanja uvoznih dažbina.

(2) Lista s podacima INF 3 može se koristiti za traženje i razmjenu podataka iz stava (1) ovog člana.

## GLAVA IV . PODNOŠENJE ZAHTJEVA I ODOBRAVANJE OSLOBAĐANJA OD PLAĆANJA UVOZNIH DAŽBINA ZA VRAĆENU ROBU

### Član 13.

(Prijavljivanje vraćene robe za postupak i dokumenta koja se podnose uz carinsku prijavu)

(1) U svrhu ostvarivanja prava na oslobađanje od plaćanja uvoznih dažbina shodno članu 177. Zakona, zainteresirano lice pri vraćanju robe, carinskom uredu ponovnog uvoza podnosi carinsku prijavu za ponovni uvoz i puštanje u slobodan promet uz oslobađanje od plaćanja uvoznih dažbina (IM 6 prijava), popunjenu u skladu sa propisima koji reguliraju pitanje podnošenja i popunjavanja carinskih prijava. Podnošenje navedene carinske prijave smatra se zahtjevom za oslobađanje od plaćanja uvoznih dažbina po članu 177. Zakona.

(2) Uz carinsku prijavu iz stava (1) ovog člana, zainteresirano lice, pored dokumenata iz stava (3) tačka a) ovog člana, podnosi i pismenu izjavu u kojoj, između ostalog, mora navesti podatke o izveznoj carinskoj prijavi po kojoj je odnosna vraćena roba bila prethodno izvezena i o dokumentima priloženim uz tu prijavu, podatke o drugim dokumentima podnesenim u odnosnom postupku, razloge vraćanja izvezene robe, podatak o tome vraća li se sva roba koja je prethodno bila izvezena ili samo dio izvezene robe, ili se vraćaju dijelovi ili pribor koji pripadaju mašinama, instrumentima, aparatima i drugim proizvodima prethodno izvezenim iz carinskog područja BiH, u kom slučaju mora navesti i podatke o prethodno izvezenim mašinama, aparatima, instrumentima i sličnoj robi kojoj pripadaju ti dijelovi ili pribor, kao i druge podatke kojima raspolaže a mogu biti od uticaja u predmetnom postupku.

(3) Kao vraćena roba, shodno članu 422. stav 1. Odluke, prihvata se sljedeća roba:

- a) roba za koju zainteresirano lice, uz carinsku prijavu iz stava (1) ovog člana, podnese i sljedeća dokumenta:
  - 1) primjerak izvozne carinske prijave, koji je izvozni carinski ured vratio izvozniku, sa ovjerom fizičkog istupa robe iz carinskog područja BiH od strane izlaznog carinskog ureda, a kod pojednostavljenih carinskih postupka (na temelju fakture i lokalni postupak izvoznog carinjenja) primjerak pojednostavljene carinske prijave i dodatne carinske prijave, ili fotokopiju takvog dokumenta za koju je izvozni carinski ured potvrdio da je vjerodostojan, ili
  - 2) listu s podacima INF 3,
- b) roba pod pokrićem karneta ATA izdatog u BiH.

(4) Kada dokazi koji su dostupni carinskom uredu ponovnog uvoza ili koji se mogu utvrditi uz pomoć zainteresiranog lica, ukazuju da je roba koja je prijavljena za ponovni uvoz i stavljanje u slobodan promet bila prvobitno izvezena iz carinskog područja BiH i istovremeno ispunjava uvjete za prihvatanje kao vraćena roba, dokumenta iz stava (3) tačka a) ovog člana nisu potrebna.

(5) Stav (3) tačka a) ovog člana ne primjenjuje se na:

- a) međunarodni prijevoz ambalaže, prijevoznih sredstava ili određene robe odobrenim prema posebnim carinskim aranžmanima, kada je važećim propisima predviđeno da carinska dokumenta nisu potrebna u takvim okolnostima,
- b) robu koja se može prijaviti za stavljanje u slobodan promet usmenim putem ili nekom drugom radnjom.

(6) Carinski ured ponovnog uvoza, kada to smatra neophodnim, može od zainteresiranog lica zahtijevati da priloži dodatne dokaze, posebno u svrhu dokazivanja istovjetnosti izvezene i vraćene robe.

#### **Član 14.**

(Postupanje po carinskoj prijavi i zapisnik o pregledu vraćene robe)

(1) Carinska prijava iz člana 13. stav (1) ovog Uputstva, putem modula selektiviteta u informacionom sistemu, upućuje se na crvenu traku (potpuna kontrola robe i dokumenata), radi provjere carinske prijave i priloženih dokumenata i pregleda prijavljene robe, a u cilju utvrđivanja ispunjenosti uvjeta za oslobađanje od plaćanja uvoznih dažbina traženog tom prijavom, a posebno utvrđivanja istovjetnosti izvezene i vraćene robe.

(2) Provjera i pregled dokumenata i robe iz stava (1) ovog člana u carinskom uredu ponovnog uvoza vrši se komisijski, a o utvrđenom stanju sačinjava se zapisnik na obrascu iz Priloga 1. ovog Uputstva. Komisiju imenuje šef carinskog ureda ponovnog uvoza iz reda zaposlenih u tom uredu. Zapisnik se sačinjava u dva primjerka, od kojih se jedan primjerak zapisnika uručuje zainteresiranom licu uz potvrdu prijema, a drugi primjerak zadržava carinski ured ponovnog uvoza uz carinsku prijavu.

(3) Ako carinski ured ponovnog uvoza, u postupku po carinskoj prijavi iz stava (1) ovog člana, utvrdi da su ispunjeni uvjeti za traženo oslobađanje od plaćanja uvoznih dažbina po članu 177. Zakona, prihvata carinsku prijavu, koje prihvatanje se smatra odobrenjem za traženo oslobađanje od plaćanja uvoznih dažbina. U tom slučaju, u prihvaćenoj carinskoj prijavi (u polju C) unosi zabilješku: "Oslobodeno po čl. 177. ZoCP".

(4) Ako carinski ured ponovnog uvoza, u postupku po carinskoj prijavi iz stava (1) ovog člana, pa i kad je podnijeta u slučaju iz člana 5. ovog uputstva, utvrdi da nisu ispunjeni uvjeti za traženo oslobađanje od plaćanja uvoznih dažbina po članu 177. Zakona, a zainteresirano lice izrazi neslaganje sa time, carinski ured ponovnog uvoza predmetnu carinsku prijavu sa zapisnikom i svom ostalom dokumentacijom dostavlja Grupi za procedure regionalnog centra kojem organizaciono pripada, na rješavanje predmetne stvari u redovnom upravnom postupku.

#### **Član 15.**

(Vraćanje robe po karnetu ATA)

Ako se roba, izvezena po karnetu ATA izdatom u BiH, vraća po tom karnetu u carinsko područje BiH može se, shodno članu 422. stav 1. treći podstav Odluke, uz ispunjenje uvjeta iz člana 177. i 178. Zakona, prihvatiti kao vraćena roba i osloboditi od plaćanja uvoznih dažbina, pa i kada je rok važenja karneta ATA istekao. Postupanje u slučaju vraćanja robe po karnetu ATA izdatom u BiH bliže je regulirano Uputstvom o provođenju carinskog postupka po karnetu ATA.

#### **Član 16.**

(Vraćanje robe koja se može prijaviti usmeno ili drugom radnjom)

Ako se u BiH vraća roba koja se može prijaviti za stavljanje u slobodan promet usmeno ili nekom drugom radnjom, zainteresirano lice koje vraća robu usmeno zahtjeva oslobađanje od plaćanja uvoznih dažbina propisano članom 177. Zakona, a nadležni carinski ured, ako posumnja u ispunjenost uvjeta za oslobađanje, od zainteresiranog lica može zahtijevati dokaze o istovjetnosti izvezene i vraćene robe.

### **Član 17.**

(Posebne okolnosti u vezi sa oslobađanjem od plaćanja uvoznih dažbina na vraćenu robu)

(1) Kada je u pitanju ponovni uvoz i stavljanje u slobodan promet uz oslobađanje od plaćanja uvoznih dažbina robe koja je prije izvoza iz carinskog područja BiH bila stavljena u slobodan promet po smanjenoj ili nultoj stopi uvoznih dažbina zbog njenog korištenja u posebne svrhe (krajnja upotreba), shodno članu 177. stav 2. tačka (b) Zakona, oslobađanje od plaćanja uvoznih dažbina propisano stavom 1. navedenog člana odobrit će se jedino ako se ponovno uvozi (vraća) za istu svrhu.

(2) Kada se roba iz stava (1) ovog člana ne uvozi ponovno za istu svrhu, iznos uvoznih dažbina obračunat za tu robu umanjit će se za iznos uvoznih dažbina plaćen prilikom njenog prvog stavljanja u slobodan promet. Ako je iznos uvoznih dažbina plaćenih pri prvom stavljanju robe u slobodan promet veći od iznosa uvoznih dažbina koje bi trebalo platiti pri ponovnom uvozu, povrat uvoznih dažbina, shodno članu 177. stav 2. drugi podstav Zakona, neće biti odobren.

(3) Prema članu 177. stav 3. Zakona, oslobađanje predviđeno stavom 1. navedenog člana, ne odobrava se ako je:

- a) roba izvezena po postupku vanjske obrade, osim ako je roba ostala u istom stanju u kakvom je izvezena,
- b) roba koja je podlijegala mjerama propisanim u BiH, uključujući i njen izvoz u druge zemlje.

## **GLAVA V. VRAĆANJE ROBE IZVEZENE NAKON POSTUPKA UNUTARNJE OBRADJE**

### **Član 18.**

(Vraćanje kompenzirajućeg proizvoda)

(1) Prema članu 179. Zakona, član 177. i 178. Zakona odgovarajuće primjenjuju se i na kompenzirajuće proizvode koji su izvezeni ili ponovno izvezeni nakon postupka unutarnje obrade, a poslije toga se, u nepromijenjenom stanju, iz određenih razloga vraćaju u carinsko područje BiH.

(2) Na postupak pri vraćanju i stavljanju u slobodan promet kompenzirajućih proizvoda iz stava (1) ovog člana odgovarajuće primjenjuju se odredbe ovog Uputstva, s tim da se kao dokumenat u svrhu identifikacije kompenzirajućih proizvoda može koristiti lista s podacima INF 1, propisana članom 320. tačka b) prva alineja Odluke i Prilogom 47 Odluke.

### **Član 19.**

(Obračun uvoznih dažbina na vraćene kompenzirajuće proizvode)

(1) Pri ponovnom uvozu i stavljanju u slobodan promet kompenzirajućih proizvoda iz člana 18. ovog Uputstva, iznos uvoznih dažbina koje se zakonski potražuju utvrđuje se na osnovu propisa koji se primjenjuju na postupak unutarnje obrade.

(2) U slučaju iz stava (1) ovog člana, oslobađanje od plaćanja uvoznih dažbina primijenit će se samo na bh. robu sadržanu u vraćenim kompenzirajućim proizvodima, uz uvjet da se na nedvosmislen način dokaže udjel bh. robe u tim proizvodima dobijenim u postupku unutarnje obrade. Kao dokazi koristi se carinska prijava po kojoj je uvozna roba stavljena u postupak unutarnje obrade u kojoj su dobijeni vraćeni kompenzirajući proizvodi, odobrenje za unutarnju obradu (uz naročitu pažnju normativu utroška materijala), carinska prijava za ponovni izvoz kompenzirajućih proizvoda, izjava



zainteresiranog lica o razlozima vraćanja izvezenih kompenzirajućih proizvoda i drugi relevantni dokazi.

(3) U slučaju iz stava (1) ovog člana, carinsku vrijednost čini vrijednost uvozne robe sadržane u vraćenim kompenzirajućim proizvodima na koju se obračunavaju uvozne dažbine i drugi potraživani indirektni porezi prema propisima koji su važili za uvoznu robu na dan prihvatanja carinske prijave za stavljanje te robe u postupak unutarnje obrade. s tim da se, shodno članu 179. stav 2. Zakona, datum ponovnog izvoza uzima kao datum stavljanja u slobodan promet. Na iznos obračunatih uvoznih dažbina obračunava se i naplaćuje, prema članu 317. Odluke, primjenjiva kompenzatorna kamata, i to za period koji počinje od prvog dana u mjesecu nakon mjeseca u kojem je uvozna roba stavljena u postupak unutarnje obrade, a završava se posljednjeg dana u mjesecu u kojem je izvršen ponovni izvoz kompenzirajućih proizvoda.

(4) Ako se radi o vraćanju kompenzirajućih proizvoda koji u sebi sadrže bh. robu i robu koja nije bh. roba, a kada, zbog tehničkih razloga, nije moguće u potpunosti uskladiti obračun uvoznih dažbina i drugih indirektnih poreza u informacionom sistemu s propisanim pravilima za obračun navedenih dažbina, carinsku prijavu sa svim priložima, uključujući i pregled tačnog obračuna uvoznih dažbina i drugih potraživanih indirektnih poreza i primjenjive kompenzatorne kamate, carinski ured ponovnog uvoza dostavlja Grupi za procedure regionalnog centra kojem organizaciono pripada taj ured na donošenje odluke u redovnom upravnom postupku o iznosu obračunatih dažbina koje se trebaju platiti za odnosnu robu.

## **GLAVA VI. ZAVRŠNE ODREDBE**

### **Član 20.**

(Sastavni dio Uputstva)

Sastavni dio ovog Uputstva čini Prilog 1. iz člana 14. stav (2) ovog Uputstva - Obrazac zapisnika o pregledu vraćene robe.

### **Član 21.**

(Stupanje na snagu)

Ovo Uputstvo stupa na snagu osmog dana od dana objavljivanja u "Službenom glasniku BiH".

**Broj: 01- 02-2-1121-10/11**  
**Datum: 20.07.2011. godine**

**V.D.DIREKTOR**  
**mr.sc. MIRO DŽAKULA**

REGIONALNI CENTAR .....  
CARINSKA ISPOSTAVA .....  
Broj: .....  
Datum, ..... godine

Komisija za pregled vraćene robe, na osnovu člana 14. Uputstva o vraćanju izvezene robe ("Službeni glasnik BiH", broj .....), dana ....., sačinila je sljedeći

**ZAPISNIK**  
o pregledu vraćene robe

1. Zainteresirano lice .....  
iz ....., IB .....
2. Roba prijavljena po IM 6 carinskoj prijavi broj: ..... od .....,  
šifra postupka .....
3. Dokumenta priložena uz IM 6 carinsku prijavu:  
.....  
.....  
.....  
.....
4. Utvrđeno stanje:  
.....  
.....  
.....  
.....  
.....  
.....  
.....
5. Zaključak Komisije:  
  
Predmetna roba **ISPUNJAVA / NE ISPUNJAVA\*** uvjete za oslobađanje  
od plaćanja uvoznih dažbina traženo po odnosnoj IM 6 carinskoj prijavi.  
  
Predmetna roba ne ispunjava uvjete za traženo oslobađanje iz razloga\*\*:  
.....  
.....  
.....  
.....  
.....  
.....  
.....

Komisija:

1. ....  
(prezime i ime, potpis i službena šifra)
2. ....
3. ....

M.P.

\*\*\*\*\* - nepotrebno precrtati  
\*\*\*\*\* - popunjava se kada je utvrđeno da nisu ispunjeni uvjeti za oslobađanje  
od plaćanja uvoznih dažbina traženo po odnosnoj IM 6 carinskoj prijavi